

wae hebbe we dáó dan....

[Jubileum: 50 jaor rapido](#) >> [Jubileumjaar](#)



Wae kint ut neet, "Café de Witte" aan de Pepijnstraat in Blièrick, taegeswaordig Preuverie de Witte geneump. Ein plek wao vuel Blièrickse vereniginge eur stamcafé van hebbe gemak en wao minnige broélof of ander fees wuürt gehalde

In 1932 noom de Fam. Verberkt dit café euver en ze kwame d'r auk te woëne.

Ut café waar toen amper véer beej véer maeter groèt en hoot nog "De weegbrug" die pal veur de deur loog.

De kins nog zéen wao paerd en ker en later de vrachwages gewaoge woorte.

Ut Spaor loog aan de euverkant en de sökkerbiete of kaole woorte met paerd en ker aangeveurd.

Paerd en ker woorte ièrs op de "waag" gewaoge zônder laajing en later met laajing, dan waar precies bekind wiewuël geleverd waar.

Aan de straotkant waar un winkelke en wao noow de parkeerplaats is stônd vrueger un tankstatiôn, dus aan werk waar gen gebrek.

Café de "waegbrök" waar un sociaal middelpunt in daen tiéd.

De mansluuj kwame in de café tössedoor eur bôterhamme opaete en drônke daobeej dan un paar tasse kôffie met al of neet un neutje.

In de jaore '30-'40 ginge de minse allein aaf en toe op zôndaagaovend op stap.

De manne drônke un paar glaeskes beer en de dames un citroentje met saoker of un advekäötje.

Op zôndaagmorge woort waal ens un kaertje gelag en un glaeske beer gedrônke met un inkel borreltje.

Um half 1 meuste de meiste männer zich weer melde beej mooder de vrouw veur ut middaagaete

Pas in 1957 kreeg dit café de naam "De Witte", de beejnaam van Toën Verberkt.

Intösse waar ut gezin Verberkt flink oètgebred met 8 kinder, waovan 5 jônges en 3 maedjes, unne drökken hoèshalt.

Un gedeilte van ut café woort gebroek as hoèskamer, want baove woort ut waat krap met 8 kinder.

Stel ôch efkes veur....

Det verhaol heejbaove geit euver mien familie want ik bin Urbaan Verberkt en Mariet zit naeve mich.

Met Mariet bin ik al mièr dan 40 jaar getrouwd en weej hebbe same vanaaf 1968 tot 2002 met vuël plezeer **Café de Witte** gerund.

In den tössentiéd hebbe we auk nog 2 kinder gekrege, nou ja gekrege, de mös d'r waal waat veur doon.

Marc dae woënt in Utrecht en Maud in Nieuw Venneep.

Mariet, wie hebs dich Urbaan lière kinne, want un kasteleinslaeve lièk mich neet gemekkelik.

Op de Berckt in Baarlo woord elk jaor unne sportdaag georganiseerd door de Kath. Jônge Middenstand oèt Blièrick

Urbaan waar speaker en ut waar um opgevalle det d'r beej de volleybalteams ein maedje rônndleep in unne greun-wit gestreepte trui en dezelfde kleur kouse. Det waar ik, Mariet Peeters oèt Lottum, det altièd vuël aan sport deej en ik waar good in ut volleybalspel.

Ze hadde mich gevraog mei te doon umdet ik gaer deej volleye en messchien waal waat puntjes kós score.



Mien mam had mich dae greun-witte trui en lange kouse gebreid.

Det véél bliékbaar erg op, dus reep de spaeker op ein gegaeve moment; Wilt det maedje in die greun-witte kleiding efkes naor baove kômme.

Mien iërste gedachte waar; waat is det veur unne waus, waat wilt dae van mich.

Ik waar nog ein greun blaedje van 19 jaar, maar ik had waal unne vrind dae binnekort naor Arabië vertrok.

Van ut ein kwaam ut ander en nao de Lottumse kermis waar ut met vrind Houben oèt en met Verberkt áan.

Ik kwaam oèt ein groët gezin en weeje hadde thoès ein roëzekwekerie en unne kiepehandel, dao had ik mien werkplek.

In 1966 bin ik gekaoze tot roëzekeunigin in Lottum en burgemeister van Leent haet mich de kroën op gezatte.

Zelfs in ut duitse Karken stônd un stökske euver de Lottumse roëzefeeste in de krant.

Veur mich waar det unne ônvergaetelikke zomer.

Urbaan waat zoel dien 2e beroepskeuze zien gewaes.

Ik heb unne kersentièd beej Garage van den Hôंबरgh gewerk maar det beveel mich neet Ik meus gauw genôg in deens waat op det moment good oèt kwaam.

Ik dink det ik in elk geval in de horeca terech waar gekômme.

Thoès had ik erfare det ut werke tösse de minse in de café elke daag anders waar.

De meus hard werke maar as jônge vent vònd ik det gen probleem.

Nao den deenstièd in 1961, besloot ik thoès te gaon werke.

Met un café, de waegbrök en ut tankstation waar d'r werk genôg te doon.

De horeca beveel good, altièd minse euver de vloer en vuël gezelligheid.

Ik vònd kaoke waal leuk en makde geregeld soep en oètsmieters veur de klante.

Veur de waegbrök meus ik auk 's-nachs aaf en toe ut bed oèt.



De boere oèt de umgaeving kwame 's-nachs de 6-waeke haenkes laote waege.
In ut duuster ware die biëste röstiger en baeter te vange dus dan meus ik un paar kièr miene slaop ônderbraeke.
De haenkes woorte dan in de laup van den daag aafgeleverd beej de firma Moormann in Goor die nog steeds besteit.
Beej elke waegbeurt kreeg ik 2 haenkes die zoëgenaamp van de ker gevalle ware, maar miene slaop waar daomei neet euver.

Löpse as kastelein neet gauw ut risico um alcoholis te waere.

Jao, dao had mien vader mich al veur gewaarschuwtd.
Umdet ut café al um 9 oor aope waar kreegse dök nao ut ôntbijt al un borreltje of un pilske aangebaoje.
In ut begin hebse neet in de gate desse nao de middaag dan al un behuurlik promiel binne hes.
Nao un half jaor begös ik det al te merke en ik besloot in elk geval nimmer véur de middaag aan de alcohol te beginne.
Ik drônk veur de middaag dökker 7-up in plaats van un pilske, dan kós ut nao de middaag waal waat lieje.
Anders had ik heej waarschienlik neet mièr gezaete en det zoel jaomer zien gewaes.

Hebse zelf waal un sociaal laeve met al det volk euver de vloer jaorelangk.

Ôs sociaal laeve waar de café, weej woënde vanaaf 1968 baove de café en we hadde auk nog tièd um 2 kinder te kriège wie ik al verteld heb.
Vuël jônge klante zooge ôs as eur vader en mooder en aan de bar hebbe d'r vuël, al of neet met un stök in de kônt, eur hert oëtgestort.
Met waat dao allemaol verteld woort had ik bes un book vol gekraege, wae wet as ik ens vuël tièd heb !
Ônder naeve de café hadde weej ôs keuke, dao stônde de jônge van de voetbalclub op zôndaagmorge karboét te bakke.
De naam van de voetbalclub woort vanaaf 1968 veranderd in "De Witte" en nao de wedstrièd woort d'r beej ôs gedouch.
Mariet wasde de shirtjes asof ut niks anders te doon had maar det ging allemaol toendertiéd.
Vuël privacy hadde we neet, det vônde we gen bezwaor, anders hilse det laeve auk neet vol.

Vuël voetballers bleve nao de wedstriéd hange en ware um 14.00 oor al blauw, en ech neet van de kelt!
Weej hadde dao gooje klante aan,.
Sôms kwame nao de middaag nog waat ega's met de kinder en dan waar de zôndaag toch un hiel ind um, as de ganse koedeljach naor hoès ging.
De tent woort sôms duchtig op de kop gezatte.
In 1976 hebbe we de groëte zaal aan laote bouwe waat vuël mièr meugelikhede goof veur de vereniging.
Rapido haet dao met brunches, jaorvergaderinge, cuisines enzoè geregeld gebroék van gemak.
Pas in 1980 zien weej naor ôs verbouwde boerderie verhoès op de Horsterwaeg.

Welke sport heb ge zelf gedaon en waat zien ôch hobby's.

Urbaan: Ik heb vuël gevoetbald en getennis.
Jagen vônd ik un hiële leuke hobby lekker in de neteur, maar det is gans euver.
Noow bring ik de meeste tièd door rundum Hause met holt kloove veur de diverse holtkachels die we hebbe.
Aan den tuin en de volière heb ik ut grutste gedeilte van ut jaor de hand vol.

Met waat vrinde un äövendje toepe kinse auk beej de hobby's telle.

Mariet: Ik heb altièd allerhande sporte gedaon: volleybal, fitness, fietse en hardlaupe. Noow doon ik niks miër aan sport maar bin gaer thoés bezig met schildere van b.v. un geboorte schilderie of puzzels oplosse.

En in de zomer van de tuin genete netuurlik, dan haet Urban auk ièr van zien werk.

Bevelt de VUT en wao geit noow de meiste tièd in zitte.

34 jaor un café -laeve is lang zat en zônder café bevelt prima, d'r kômme andere dinger veur in de plaats.

De mós in ut begin winne aan de plenty vreeje tièd maar det zal iddere vutter waal hebbe.

We hebbe 4 kleinkinder, die neet in de buurt woëne en dao wille we geregeld op bezeuk gaon of zeej beej ôs.

Mét café woorse gedeiltelik gelaef, d'r meus van alles gedaon waere auk as d'r gen klante ware.

Noow halde we ut VUT-tempo aan en asse d'r vandaag genne zin in haes duisse ut morge.



Heb ge toevallig nog leuke of vervaelende herinneringe oèt de Rapidotied.

Rapido had ièrs eur stamlokaal beej Tivoli en is in de jaore '70 naor "De Witte" gekômme.

Mariet:

Ik herinner mich nog iets leuks oèt de beginjaore.

Toen in de jaore '70 ut drinke van Spa roëd en Spa blauw unne trend woort woel Mien Smeets det auk waal ens probere.

Wie ik ut glaeske Spa roëd veur um neerzat zag ut hiël teleurgesteld; maar Mariet dae is gaar neet roëd.

Urbaan:

Hay Smeets waar ein van de doorzakkers op dônderdaagaovend.

Hae had ziene jas aan de kapstok gehange maar de autosleutels en hoëssleutel in de tes laote zitte.

Dóm, dóm, dóm zoelse zegge.

Toen hae taeye sloétingstiéd naor hoës woel gaon waar ziene jas weg, dus auk de sleutels.

Eine van Band 81 had per ôngelök de verkierde jas aangetrokke.

Un ander Rapidolid waar zoè good um Hay efkes naor Venlo te bringe..

Maar veurdet ze Tiny wakker hadde um de deur aoepe te make, waar ut haos tièd um naor ut werk te gaon op vriédaagmorge.

Ziene wage stônd intösse beej De Witte hiël hendig vlak veur ut tankstation geparkeerd.

Op unne winteraovend met vuël snië vroeg un Rapidolid unne handvaeger um de auto schoën te make.

Nao un kwarter kwaam hae kalt en naat truuk um zich efkes op te werme en woel toen naor hoes rieje

Waat raar, de sleutel pasde neet op de schoëngemakde auto.

Jaowaal huër hae had in ut duuster de verkiërde auto gepak en kôs nao vuël gevloek weer

opnieuw beginne.

Nae Hay, deze kiër waar ut un ander Rapidolid.!

We makde dök waat lekkers veur de vaste klante.

Ôs Gerda deej snookbaars in gelei en aek inwecke, dao haet mennigein van kinne meismikkele aangevöld met zwartbroöd.

De pliesie kwaam 's-nachs waal ens langs en knipperde met ut leech, eur sein det we meuste sloéte.

Dan meus binne ut half oor auk alles geslaote zien, weej hadde dao noëts probleme mei.

Tóen waar de pliesie nog "uw vriend en helper".

As dank veur de soepele sloétingstièd belde ik op aswoensdaag naor de pliesie.

Degene die nachdeens hadde kóste zich beej ôs hieringslaaj kômme haole.

De mós "diene vrind" aaf en toe un "hendje" helpe.

Got ge gaer op vakantie en welke plek haet ôch veurkeur.

Vruüger ginge we 2 of 3x per jaor skieë.

Vanaaf det we gestop zien met de café in 2002 is de behoefte um op vakantie te gaon d'r neet mièr.

We hebbe un prachtig hoès en unne lekkere tuin, heej kriège we den tièd good um.

Toch gaon we de letste jaore zomers dökker same met de kinder en kleinkinder op vakantie.

We zien met eur in Toscane en op Madeira gewaes.

De kleinkinder zitte in laeftièd tösse de 8 en anderhalf jaor, dus unne oppas is altièd nuèdig.

Ut is good veur den band met de kleinkinder um ze ens un waek of langer achterein mei te make.



Heb ge un laevesmotto en waat is det.

Ôs laevesmotto is: **Waat kump, det kump.**

Urbaan: Det waar auk mien prinsemotto in 1980 en det geldt nog steeds.

Waat haet de grutste impact gehad in dien laeve.

Urbaan:

Ik heb in 1967 un zwaor auto-ôngelök gehad en bin taege unne baum geknald in Grubbevors.

Miene 4e en 5e halswervel ware gebraoke en ik moch beslis neet bewaege um verlaaming te veurkômme.

Ik heb zeker 4 maond in ut ziekehoès gelaege met miene kop tösse zandzakke um bewaeging te veurkômme.

De revalidatie haet aardig waat tièd gekos maar ik kin ut naovertelle.

De besefs dan pas good wie snel ut gebeurde kin zien.

Miene ingelbewaarder haet toen good zien bes gedaon en dao bin ik nog bliej um.

Wao wuurse hiël bliej of gelökkig van.

Urbaan:

Ik waer hiël bliej as ik de kleinkinder eine kiër in de maond zeen.

En as ik win met kaarte van Herman Hovens (de sloper), det is super.

Mariet:

Ik waer hiël blij as Urbaan weg is en ik röstig kin schildere zônder det mich emus stoort. Zomers lekker van de tuin geneete met gezellige luuj die op bezoek kómme, dao waer ik auk blij van.

Wao dinkse aan beej ut woord Kersmis.

Aan gezellig same zien, familie, lekker aete en vuël beejbabbele.

Vruùger waar de Kersaovend en Kersdaag de enige daag det ut café geslaote waar.

Veur ôs kinder Verberkt dé topdaag van ut jaor, want Pap en Mam hadde dan alle tièd veur ôs.

Noow halde we met de ganse familie Verberkt op 1e kersdaag de familiedaag met 33 volwassene en 15 kinder.

We beginne 's-morges met zelfgemakde krokette en lekkere zôndaagse soep.

Nao de middaag gaon we met de ganse koedeljach de bôs in want zeg noow zelf, met dit waer bisse op wintersport in eige land.

's-Aoves hebbe we un gezamenlik kersdiner net wie vruùger, lekker beejpraote met idderein en intösse geneete van ut aete en drinke.

De saamhuurigheid en de gezellige sfeer gaeve un nostalgisch gevoel.

Waoreuver wilt ge nog waat kwièt.

Un kersmöpke:

De hoèsarts had met Kersmis de kelder ônder water staon en belde de loëdgeter.

Dae woel met die feesdaag neet kômme maar umdet de hoèsarts bleef belle kwaam hae toch efkes kièke.

Hae bekeek zich de situatie en vroeg aan de hoèsarts; heb geej 2 paracetamol veur mich.

Jaozeker zag de dokter, astebleef maar waat mösse daomei.

De loëdgeter goëjde de 2 paracetamol in ut water en zag; euver un paar daag geit ut vanzelf euver.

Weej winse idderein ein sportief en gezônd 2011.

Elly van Elswijk

